

Trais da quatter giuvenils fan almain ina sborgna il mais

■ (Iq) Far ina sborgna è la regla e na betg l'excepciun tar ils giuvenils. Trais da quatter giuvenils èn tenor in studi da l'Universitad da Losanna almain ina giada il mais sturns sco millas. Tenor ils experts valian quests resultats per l'entira Svizra e pretendian novas strategias da prevenziun.

Per il studi han ils scienziats interrogà 3536 umens giuvenils a chascun da la mustra 2007. Tar il consum d'alcohol differenzieschan ils experts tranter las terras dal nord – Gronda Britannia e Scandinavia – nua ch'i vegn bavà malregulà, dentant sur mesira e las terras da l'Europa dal sid nua ch'ils umans baivan alcohol pli savens dentant cun mesira. La Svizra vegneva quintada enfin uss tar la segunda grupp.

Savens sturns

En il studi da Losanna han inditgà sur 75% dals interrogads da consumar almain ina giada il mais tar ina suletta occasiun dapli che sis bavrondas alcoholicas. Quai correspunda ad in nivel d'alcohol da circa in promil en il sang. A partir da questa valur ple-

dan ils specialists dad in consum ristgà d'alcohol.

Las analisas mussan che pressapoc 70% dal consum total d'alcohol van sin il conto da talas sborgnas. E 96% da l'alcohol vegnan consumads da giuvenils che fan mintgatant ina vaira sborgna, mo 4% vegnan consumads da giuvenils che baivan mai sur mesira.

Circa 63% dals giuvenils han schizunt inditgà d'avair consumà diesch u dapli bavrondas alcoholicas tar ina suletta occasiun. Quai tanscha dentant anc adina betg: Mintga quart ha bavà aifer in onn almain ina giada schizunt sur 20 bavrondas alcoholicas.

Sborgnas èn la regla

Il studi mussa che far sborgnas è la regla e na l'excepciun tar ils umens da 19 onns. Per ils auturs dal studi basegni novas strategias da prevenziun. Ils sforzs dad enfin quà hajan fatg naufragi. La finamira en il futur stoppia esser da prender en mira tut ils giuvenils e betg mo las gruppas cun in aut ristgà d'alcohol.

«L'industria d'alcohol pretenda ch'ella vivia d'in giudiment cun mesira, noss studi mussa che quai

na constat betg», di *Jean-Bernard Daepfen*, chaumedi al Center per il tractament da malsognas d'alcohol al spital universitar Losanna. «I na sa tracta betg mo d'ina gruppa pitschna dad umans che surfan cun baiver, mabain da trais quartas dals giuvenils.»

Mesiras pauc popularas

Il perscrutader è perschudà ch'igl è impurtant d'appplitgar a moda consequenta la lescha vertenta. Las limitas da vegliadetgna da 16 onns per cumprar gervosa e vin sco quella da 18 onns per spirituosas ed alcopops stoppian vegnir respectadas. Era ord punctg da vista da la prevenziun fissan ulteriuras mesiras giavischadas. «Persunas alcoholisadas chascunan per exempel dapli accidents d'autos, commettan dapli acts da violenza e han pli savens sex nunprotegi. Las mesiras las pli efficientas sajan dentant era las pli nunpopularas, di Daepfen. Auzaments da pretschs na vegnian acceptads e la proposta da l'Uffizi federal per sanadad da scumandar da vender alcohol a partir da las nov la saira hajan già nagina schanza en il cussegl federal.



Trais da quatter giuvenils fan regularmain ina sborgna.